

牧民心書序

昔舜紹堯 咨十有二牧 俾之牧民 文王立政 乃立司牧 以爲牧夫 孟子之平陸 以芻牧 喻牧民 養民之謂牧者 聖賢之遺義也 聖賢之教 原有二途 司徒教萬民 使各修身 大學教國子 使各修身而治民 治民者 牧民也 然則君子之學 修身爲半 其半牧民也 聖遠言湮 其道寢晦 今之司牧者 唯征利是急 而不知所以牧之 於是下民羸困 乃瘵乃癢 相顛連以實溝壑 而爲牧者 方且鮮衣美食以自肥 豈不悲哉

吾先子受知聖朝 監二縣 守一郡 護一府 牧一州 咸有成績 雖以鏞之不肖 從以學之 竊有聞焉 從而見之 竊有悟焉 退而試之 竊有驗焉 旣而流落 無所用焉 窮居絕徼 十有八年 執五經四書 反復研究 講修己之學 旣而曰：學學半 乃取二十三史及吾東諸史 及子集諸書 選古司牧牧民之遺迹 上下紬繹 彙分類聚 以次成編 而南徼之地 田賦所出 吏奸胥猾 弊癘焚興 所處旣卑 所聞頗詳 因亦以類疏錄 用著膚見 共十有二篇 一曰赴任 二曰律己 三曰奉公 四曰愛民 次以六典 十一曰賑荒 十二曰解官 十有二篇 各攝六條 共七十二條 或以數條 合之爲一卷 或以一條 分之爲數卷 通共四十八卷 以爲一部 雖因時順俗 不能上合乎先王之憲章 然於牧民之事 條例具矣

高麗之季 始以五事 考課守令 國朝因之 後增爲七事 所謂責其
大指而已 然牧之爲職 靡所不典 歷舉衆條 猶懼不職 矧冀其自
考而自行哉 是書也 首尾二篇之外 其十篇所列 尚爲六十 誠有
良牧 思盡其職 庶乎其不迷矣

昔傳琰作理縣譜 劉彝作法範 王素有獨斷 張詠有戒民集 真德秀
作政經 胡大初作緒言 鄭漢奉作宦澤篇 皆所謂牧民之書也 今其
書多不傳 唯淫辭奇句 霸行一世 雖吾書 惡能傳矣 雖然 易曰多
識前言往行以畜其德 是固所以畜吾之德 何必於牧民哉

其謂之心書者何 有牧民之心 而不可以行於躬也 是以名之

當寧二十一年辛巳莫春 洌水丁若鏞序